

SAKSUTGREIING

Aurland fjellstyre

Møtedato: 19.5.20

Stad: Fjordsenteret

Sak 24/20. Samjaktavtalen mellom statsallmenning og private jaktfelt i Aurland

Saksopplysning/vurdering

Samjaktavtalen mellom statsallmenningen og dei private jaktfelta i Aurland gjekk ut etter jakta i 2019, då han var godkjend for 5-årsperioden 2015-2019. Kopi av avtalen ligg ved.

Samjaktavtalen kom første gong i stand i 1976, etter at Fjelleva som kom året før opna for slike ordningar, og har etter dette vore gjeldande utan avbrot og med få endingar. Det er no aktuelt å fornya avtalen for t.d. ein 5-årsperiode. Det kan vera aktuelt å senda avtalen ut att til underskriving av alle jaktfeltansvarlege, dersom ein ikkje finn ei enklare løyvsing, som t.d. at leiar/styret i grunneigarlaget skriv under på vegne av dei tilslutta jaktfelta. Dette er noko som styret i grunneigarlaget for villreinvald må ta stilling til. Ved ei eventuell utsending til alle jaktfelt må ein gå ut frå at det kan koma innspel til dei ulike punkta i avtalen. Dette må då fjellstyret og styret i grunneigarlaget ta med i vurderinga, før ein endeleg avtaletekst vert skriven.

Når det gjeld praktiseringa av avtalen, må ein vel kunna seia at han har gjort jakta enklare å utøva for jegerane, og grensene lettare å forhalda seg til for både jegerar og oppsyn. Det er mykje truleg at samjaktavtalen har medverka til ei betre felling enn det ein ville ha hatt dersom alle berre kunne jakta på det jaktfeltet der korta var utskrivne. Jaktstatistikken for Aurland syner at 60-70 % av dyra årleg vert felte på andre jaktfelt enn der korta er utskrivne, d.v.s. i medhald av samjaktavtalen. Sjølv sagt har ein og sett negative utslag som følgje av avtalen. Når store flokkar med dyr har nærma seg kommunegrensa kan alle innanbygds jegerar, både dei med privatkort og dei med allmenningskort, samla seg der flokkane er venta å koma inn. Dette kan gjera at flokkane snur på grensa, eller at det oppstår uheldige jaktepisodar med mange jegerar innblanda når flokken kjem inn. Dette problemet har ein helst sett i periodar med store fellingskvotar.

Vurdering etter naturmangfaldlova:

I følge § 7 i denne lova skal §§ 8 – 12 i lova leggast til grunn ved utøving av offentleg mynde, som i dette tilfellet går på å tillata samjakt mellom statsallmenning og private jaktfelt.

§ 8 (kunnskapsgrunnlaget). Villreinformaltinga sit på mykje innsamla kunnskap om villreinstamma i Nordfjella, som teljeresultat gjennom mange år, og erfaring med fellingstal ut frå varierende fellingskvotar og ulike modellar for samjakt. Det er kjent at gode samjaktavtalar gjerne gjev betre felling.

§ 9 (føre-var-prinsippet). Det føreligg ingen risiko for skade på naturmangfaldet ved vidareføring av ein samjaktavtale. Tvert imot vil det auka sjansen for å oppfylle måla i bestandsplanen for området, ved at ein med god felling betrar sjansane for framleis å ha ein bestand med høveleg dyretal og store, livskraftige dyr. Andre artar enn villrein vil ikkje bli påverka.

SAKSUTGREIING

Aurland fjellstyre

Møtedato: 19.5.20

Stad: Fjordsenteret

Sak 24/20, side 2

§ 10 (økosystemtilnærming og samla belastning), ikkje relevant.

§ 11 (kostnadene med miljøforringing skal berast av tiltakshavar). Ikkje relevant.

§ 12 (miljøforsvarlege teknikkar og driftsmetodar). Ikkje relevant.

Eg har ingen forslag til endringar i ordlyden i høve til tidlegare avtale.

Framlegg til vedtak:

Fjellstyret sender samjaktavtalen, i den forma han har hatt dei siste 5 åra, over til grunneigarlaget for villreinvald i Aurland, med sikte på å få avtalen godkjend for ein ny 5-årsperiode. Fjellstyreleiar får fullmakt til å godkjenna evt. mindre endringar i ordlyden i avtalen, etter handsaming i grunneigarlaget.

Fjellstyrekontoret, den 11.5.20

Harald Skjerdal

SAMJAKTAVTALE FOR 2015-2019

Samjaktavtale vert inngått mellom jaktfelt NF 401 - 402 - 451 Aurland Statsallmenning og dei private jaktfelti i Aurland tilhøyrande Nordfjella Villreinområde som innan 1.6.15 sluttar seg til denne avtalen ved forpliktande underskrift av respektive jaktfeltansvarlege.

- 1 Fellingsløyve frå dei privateigde jaktfelti kan nyttast i statsallmenningane i heile jakttdi. Tilsvarande kan fellingsløyve frå NF 401 - 402 og 451 nyttast i dei private jaktfelti som sluttar seg til denne avtalen.
- 2 Denne avtalen er underordna vedtak om avgrensingar av jakti eller jaktområdet fatta av jaktrettshavarane eller forvaltningsorgani elles.
- 3 Fellingsløyve for villrein skal primært vera eit tilbod til innanbygdsbuande. Privatkort som ikkje vert selde i bygdi, kan omsetjast gjennom Grunneigarlaget for Villreinvald for inntil det doble av prisen på fjellstyrekorti. Grunneigar kan fritt overdra kort til innanbygdsbuande, og til utanbygdsbuande foreldre, born, svigerborn og sysken utan å gå gjennom Grunneigarlaget. Fjellstyret kan selja kort til utanbygdsbuande når alle innanbygds søkjarar har fått tildelt kort.
- 4 Dei jaktfelti som sluttar seg til avtalen pliktar å gjera sine jegrar kjende med offentlege lover og reglar for jakt, samt reglar for jakt fastsette av lokale forvaltningsorgan. Ved brot på slike reglar kan avtalen seiast opp for vedkommande felt.
- 5 Grunneigarane gjev jaktoppsynet fullmakt til å melda ulovlege grenseoverskridingar.
- 6 Grunneigarlaget for Villreinvald kan fritt omsetja restkort til inntekt for drift av laget og Villreinutvalet . Korti kan nyttast i alle felt innan NF 400 som er med i denne avtalen.
- 7 Denne avtalen hindrar ikkje at avtalepartane kan inngå andre samjaktavtalar.
- 8 Jaktfelt kan seia opp avtalen innanfor avtaleperioden med ni månaders varsel.

Dato _____

For Aurland Fjellstyre

For NF _____